



Deddf yr Amgylchedd (Ansawdd Aer a Seinweddau) (Cymru) 2024

2024 dsc 2

RHAN 1

ANSAWDD AER

PENNOD 1

TARGEDAU CENEDLAETHOL

1 Targedau ansawdd aer: cyffredinol

- (1) Caiff Gweinidogion Cymru drwy reoliadau osod targedau hirdymor mewn cysylltiad ag unrhyw fater sy'n ymwneud ag ansawdd aer yng Nghymru.
- (2) Rhaid i Weinidogion Cymru arfer y pŵer yn is-adran (1) er mwyn gosod targed hirdymor mewn cysylltiad ag un o'r llygryddion a ganlyn—
 - amonia;
 - PM10;
 - osôn ar lefel y ddaear;
 - nitrogen deuocsid;
 - carbon monocsid;
 - sylffwr deuocsid.
- (3) Rhaid i darged a osodir o dan yr adran hon—
 - pennu safon i'w chyflawni, y mae rhaid gallu ei mesur yn wrthrychol, a
 - pennu dyddiad erbyn pryd y mae'r safon i'w chyflawni.
- (4) Caiff rheoliadau o dan yr adran hon wneud darpariaeth ynghylch sut y mae mesur y mater y gosodir targed mewn cysylltiad ag ef.

- (5) Rhaid i reoliadau o dan yr adran hon sy'n gosod y targed sy'n ofynnol o dan is-adran (2) bennu bod y targed wedi ei osod i gydymffurfio â'r is-adran honno.
- (6) Mae targed yn "targed hirdymor" os yw'r dyddiad penodedig o leiaf 10 mlynedd ar ôl y dyddiad y gosodir y targed arno.
- (7) Mae targed o dan yr adran hon wedi ei osod pan ddaw'r rheoliadau sy'n ei osod i rym.
- (8) Yn y Bennod hon—
 - (a) ystyr "PM10" yw deunydd gronynnol sydd â diamedr aerodynamig nad yw'n fwy na 10 o ficrometrau;
 - (b) ystyr y "safon benodedig" a'r "dyddiad penodedig", mewn perthynas â tharged a osodir o dan yr adran hon, yw'r safon a'r dyddiad a bennir o dan is-adran (3).

2 Targedau ansawdd aer: deunydd gronynnol

- (1) Rhaid i Weinidogion Cymru drwy reoliadau osod o leiaf un targed ("targed ansawdd aer PM2.5") mewn cysylltiad â'r lefel gymedrig flynyddol o PM2.5 mewn aer amgylchynol yng Nghymru.
- (2) Caiff targed ansawdd aer PM2.5 fod yn darged hirdymor ond nid oes angen iddo fod felly.
- (3) Yn yr adran hon, ystyr PM2.5 yw deunydd gronynnol sydd â diamedr aerodynamig nad yw'n fwy na 2.5 o ficrometrau.
- (4) Rhaid i Weinidogion Cymru sicrhau bod "aer amgylchynol" wedi ei ddiffinio at ddibenion pob targed ansawdd aer PM2.5 (a chaiff rheoliadau o dan yr adran hon wneud darpariaeth wahanol ar gyfer targedau gwahanol at ddibenion yr is-adran hon).
- (5) Mae adran 1(3) i(4) a (6) i (8) yn gymwys i dargedau ansawdd aer PM2.5 ac i reoliadau o dan yr adran hon fel y mae'n gymwys i dargedau a osodir o dan adran 1 ac i reoliadau o dan yr adran honno.
- (6) Yn y Bennod hon, ystyr "targed ansawdd aer PM2.5" yw targed a osodir o dan yr adran hon.

3 Y broses o osod targedau

- (1) Cyn gwneud rheoliadau o dan adran 1 neu 2, rhaid i Weinidogion Cymru—
 - (a) ceisio cyngor gan bersonau y maent yn ystyried eu bod yn annibynnol ac yn meddu ar arbenigedd perthnasol, a
 - (b) rhoi sylw i wybodaeth wyddonol ynghylch llygredd aer.
- (2) Cyn gwneud rheoliadau o dan adran 1 neu 2 sy'n gosod neu'n diwygio targed mewn cysylltiad â llygrydd penodol, rhaid i Weinidogion Cymru roi sylw i unrhyw ganllawiau ar gyfer y llygrydd hwnnw a gyhoeddwyd gan Sefydliad Iechyd y Byd yn ei ganllawiau ansawdd aer byd-eang diweddaraf.
- (3) Cyn gwneud rheoliadau o dan adran 1 neu 2 sy'n gosod neu'n diwygio targed, rhaid i Weinidogion Cymru fod wedi eu bodloni y gellir cyflawni'r targed neu'r targed diwygiedig.

- (4) Ni chaiff Gweinidogion Cymru wneud rheoliadau o dan adran 1 neu 2 sy'n dirymu neu'n gostwng targed (y "targed presennol") onid ydynt wedi eu bodloni—
- na fyddai cyflawni'r targed presennol o unrhyw fudd sylweddol o gymharu â pheidio â chyflawni'r targed neu gyflawni targed is, neu
 - yn sgil newidiadau mewn amgylchiadau ers gosod y targed presennol neu ei ddiwygio ddiwethaf, y byddai costau amgylcheddol, costau cymdeithasol, costau economaidd neu gostau eraill cyflawni'r targed yn anghymesur â'r buddion.
- (5) Cyn gwneud rheoliadau o dan adran 1 neu 2 sy'n dirymu neu'n gostwng targed, rhaid i Weinidogion Cymru osod gerbron Senedd Cymru, a chyhoeddi, ddatganiad sy'n esbonio pam y mae Gweinidogion Cymru wedi eu bodloni fel y'i crybwyllir yn is-adran (4).
- (6) Mae rheoliadau yn gostwng targed os ydynt, i unrhyw raddau—
- yn gosod safon is yn lle'r safon benodedig, neu
 - yn pennu dyddiad diweddarach yn lle'r dyddiad penodedig.
- (7) Ni chaiff rheoliadau o dan adran 1 ddirymu'r targed ansawdd aer sydd wedi ei osod i gydymffurfio ag is-adran (2) o'r adran honno (ond cânt ei ddiwygio yn unol â'r adran hon).
- (8) Ni chaiff rheoliadau o dan adran 2 ddirymu targed ansawdd aer PM2.5 (ond cânt ei ddiwygio yn unol â'r adran hon).
- (9) At ddibenion y Bennod hon, mae targed wedi ei gyflawni os yw'r safon benodedig wedi ei chyrraedd erbyn y dyddiad penodedig.
- (10) Rhaid i Weinidogion Cymru osod drafft o offeryn statudol sy'n cynnwys y rheoliadau sy'n ofynnol gan adran 1(2) gerbron Senedd Cymru cyn diwedd y cyfnod o 6 mlynedd sy'n dechrau â'r dyddiad y caiff y Ddeddf hon y Cydsyniad Brenhinol.
- (11) Rhaid i Weinidogion Cymru osod drafft o offeryn statudol sy'n cynnwys rheoliadau sy'n gosod targed ansawdd aer PM2.5 gerbron Senedd Cymru cyn diwedd y cyfnod o 3 blynedd sy'n dechrau â'r dyddiad y caiff y Ddeddf hon y Cydsyniad Brenhinol.

4 Effaith targedau

- (1) Rhaid i Weinidogion Cymru sicrhau—
- bod targedau a osodir o dan adran 1 yn cael eu cyflawni, a
 - bod targedau ansawdd aer PM2.5 yn cael eu cyflawni.
- (2) Nid oes dim yn y Bennod hon, heblaw am adran 8, yn cyfyngu ar bŵer Gweinidogion Cymru o dan adran 87 o [Ddeddf yr Amgylchedd 1995 \(p. 25\)](#) (pŵer i wneud rheoliadau mewn perthynas ag asesu neu reoli ansawdd aer).

5 Adrodd ar dargedau

- (1) Rhaid i reoliadau o dan adran 1 neu 2 bennu dyddiad adrodd ar gyfer unrhyw darged a osodir o dan yr adran honno.
- (2) Rhaid i Weinidogion Cymru, ar y dyddiad adrodd neu cyn hynny, osod gerbron Senedd Cymru, a chyhoeddi, ddatganiad sy'n cynnwys yr wybodaeth ofynnol ynghylch y targed.

Statws This is the original version (as it was originally enacted).

- (3) Yr wybodaeth ofynnol ynghylch targed yw (fel sy'n briodol)—
- bod y targed wedi ei gyflawni,
 - nad yw'r targed wedi ei gyflawni, neu
 - nad yw Gweinidogion Cymru ar hyn o bryd yn gallu canfod pa un a yw'r targed wedi ei gyflawni, y rhesymau dros hynny a'r camau y mae Gweinidogion Cymru yn bwriadu eu cymryd er mwyn canfod pa un a yw'r targed wedi ei gyflawni.
- (4) Pan fo Gweinidogion Cymru yn gwneud datganiad nad yw targed wedi ei gyflawni, rhaid i Weinidogion Cymru, cyn diwedd y cyfnod o 12 mis sy'n dechrau â'r dyddiad y gosodir y datganiad, osod gerbron Senedd Cymru, a chyhoeddi, adroddiad.
- (5) Rhaid i'r adroddiad—
- esbonio pam nad yw'r targed wedi ei gyflawni, a
 - nodi'r camau y mae Gweinidogion Cymru wedi eu cymryd, neu'r camau y maent yn bwriadu eu cymryd, i sicrhau y cyflawnir y safon benodedig cyn gynted ag y bo'n rhesymol ymarferol.
- (6) Pan fo Gweinidogion Cymru yn gwneud datganiad nad ydynt ar hyn o bryd yn gallu canfod pa un a yw targed wedi ei gyflawni, rhaid i Weinidogion Cymru, cyn diwedd y cyfnod o 6 mis sy'n dechrau â'r dyddiad y gosodir y datganiad, osod gerbron Senedd Cymru, a chyhoeddi, ddatganiad pellach sy'n cynnwys yr wybodaeth ofynnol.
- (7) Mae is-adrannau (3) i (6) yn gymwys i ddatganiadau pellach o dan is-adran (6) fel y maent yn gymwys i ddatganiad o dan is-adran (2).

6 Adolygu targedau

- (1) Rhaid i Weinidogion Cymru adolygu targedau o dan adrannau 1 a 2 yn unol â'r adran hon.
- (2) Wrth gynnal adolygiad, rhaid i Weinidogion Cymru—
- ceisio cyngor gan bersonau y maent yn ystyried eu bod yn annibynnol ac yn meddu ar arbenigedd perthnasol, a
 - rhoi sylw i wybodaeth wyddonol ynghylch llygredd aer.
- (3) Os yw targed o dan adran 1 neu 2 mewn cysylltiad â llygrydd y mae canllawiau wedi eu cyhoeddi ar ei gyfer gan Sefydliad Iechyd y Byd yn ei ganllawiau ansawdd aer bydeang diweddaraf, rhaid i Weinidogion Cymru, wrth gynnal adolygiad o'r targed, roi sylw i'r canllawiau mewn cysylltiad â'r llygrydd hwnnw.
- (4) Ar ôl cynnal adolygiad, rhaid i Weinidogion Cymru osod gerbron Senedd Cymru, a chyhoeddi, ddatganiad ynghylch y camau, os oes rhai, y maent yn bwriadu eu cymryd o dan adran 1 neu 2 mewn perthynas â phob targed o ganlyniad i'r adolygiad.
- (5) Pan fo datganiad yn darparu nad yw Gweinidogion Cymru yn bwriadu cymryd unrhyw gamau o dan adrannau 1 neu 2 mewn perthynas â tharged, rhaid i'r datganiad gynnwys y rhesymau dros y penderfyniad hwnnw.
- (6) Rhaid cwblhau'r adolygiad cyntaf cyn diwedd y cyfnod o 5 mlynedd sy'n dechrau â'r diwrnod y gosodir y targed cyntaf (pa un ai o dan adran 1 neu 2).
- (7) Rhaid cwblhau adolygiadau dilynol cyn diwedd y cyfnod o 5 mlynedd sy'n dechrau â'r diwrnod y cwblhawyd yr adolygiad blaenorol.

- (8) Mae adolygiad wedi ei gwblhau pan fo Gweinidogion Cymru wedi gosod y datganiad gerbron Senedd Cymru a'i gyhoeddi.

7 Monitro hynt cyflawni targedau

- (1) Rhaid i Weinidogion Cymru drefnu cael gafael ar ddata ynghylch ansawdd aer yng Nghymru y maent yn ystyried eu bod yn briodol i fonitro hynt cyflawni unrhyw dargedau a osodir o dan adran 1 neu 2.
- (2) Rhaid i Weinidogion Cymru gyhoeddi unrhyw ddata a geir o dan is-adran (1) cyn gynted ag y bo'n rhesymol ymarferol.

8 Cynnal safonau ansawdd aer

- (1) Mae'r adran hon yn gymwys mewn perthynas â safon benodedig ar gyfer targed a bennir o dan adran 1 neu 2 pan fo—
- (a) y dyddiad penodedig ar gyfer y targed wedi ei gyrraedd, a
- (b) y safon benodedig ar gyfer y targed wedi ei chyflawni (boed erbyn y dyddiad penodedig neu erbyn dyddiad diweddarach).
- (2) Rhaid i Weinidogion Cymru, wrth arfer eu pwerau o dan adran 87(1) o [Ddeddf yr Amgylchedd 1995 \(p. 25\)](#), sicrhau—
- (a) bod Gweinidogion Cymru o dan ddyletswydd i gynnal y safon honno, a
- (b) bod gofynion adrodd ar waith mewn perthynas â chyflawni'r ddyletswydd honno.
- (3) Caiff Gweinidogion Cymru arfer eu pwerau o dan adran 87(1) o [Ddeddf yr Amgylchedd 1995](#) i ddisodli'r safon a grybwyllir yn is-adran (2)(a) â safon is, neu i ddirymu'r safon, ond dim ond os ydynt wedi eu bodloni—
- (a) na fyddai cyrraedd y safon o unrhyw fudd sylweddol o gymharu â pheidio â chyrraedd y safon neu gyrraedd safon is, neu
- (b) yn sgil newidiadau mewn amgylchiadau ers i'r safon benodedig gael ei gosod neu ers iddi gael ei gostwng ddiwethaf, y byddai costau amgylcheddol, costau cymdeithasol, costau economaidd neu gostau eraill ei chyrraedd yn anghymesur â'r buddion.
- (4) Cyn gwneud rheoliadau o dan adran 87(1) o [Ddeddf yr Amgylchedd 1995](#) at unrhyw ddiben a grybwyllir yn is-adran (3), rhaid i Weinidogion Cymru (yn ogystal â chydymffurfio ag adran 87(7B) o'r [Ddeddf honno](#))—
- (a) ceisio cyngor oddi wrth bersonau y maent yn ystyried eu bod yn annibynnol ac yn meddu ar arbenigedd perthnasol,
- (b) rhoi sylw i wybodaeth wyddonol ynghylch llygredd aer,
- (c) rhoi sylw i unrhyw ganllawiau mewn cysylltiad â'r llygrydd y mae'r safon yn gymwys iddo a gyhoeddwyd gan Sefydliad Iechyd y Byd yn ei ganllawiau ansawdd aer byd-eang diweddaraf, a
- (d) gosod gerbron Senedd Cymru, a chyhoeddi, ddatganiad sy'n esbonio pam y mae Gweinidogion Cymru wedi eu bodloni fel y'i crybwyllir yn is-adran (3).

9 Adrodd mewn perthynas ag adran 1

- (1) Rhaid i Weinidogion Cymru, cyn gynted ag y bo'n ymarferol ar ôl diwedd pob cyfnod adrodd, osod gerbron Senedd Cymru a chyhoeddi adroddiad ar yr ystyriaeth y maent wedi ei rhoi yn ystod y cyfnod hwnnw i osod targedau hirdymor o dan adran 1.
- (2) Rhaid i'r adroddiad, yn benodol, ymdrin â'r ystyriaeth a roddwyd yn ystod y cyfnod adrodd i osod targedau mewn perthynas â'r llygryddion a ganlyn—
 - (a) amonia;
 - (b) PM10;
 - (c) osôn ar lefel y ddaear;
 - (d) nitrogen deuocsid;
 - (e) carbon monocsid;
 - (f) sylffwr deuocsid.
- (3) Ond os yw rheoliadau wedi eu gwneud o dan adran 1 sy'n gosod targed mewn perthynas â llygrydd a grybwyllir yn is-adran (2), nid yw'r gofyniad yn yr is-adran honno bellach yn gymwys mewn perthynas â'r llygrydd hwnnw.
- (4) Yn yr adran hon, ystyr "cyfnod adrodd" yw—
 - (a) y cyfnod o 2 flynedd sy'n dechrau â'r diwrnod y mae adran 1 yn dod i rym, a
 - (b) pob cyfnod dilynol o 12 mis.